

## Последование исходное монахов

Егда кто от монахов ко Господу отидет, понеже не подобает омыватися телу его, ниже видетися отнюд нагу, на сие учиненный монах губою отирает мощи его теплою водою, творя прежде губою крест на челе скончавшагося, на персех, на руках, и на ногах, и на коленях, вящше же ничтоже. Потом же приносит чистую ризу, и облачит его, от'емшейся первее ветсей, никакоже наготу его видеви; и по внегда облещи его, возлагает на него кукуль. Аще великаго образа есть, обложив шлемом свыше главы, и свесив и даже до браны, якоже не видетися лицу мощей его. Таже облагает на него аналав по чину его и палии, и опоясует его поясом усмяным, и обувает в сандалия новыя. (Аще же малаго образа есть, точию во власяницу и рясу, и на главе его подкапок, и камилава возлагается). Таже простирается мандия его косвенне, и поднесши мощи с рогозины, простирают ю под мощи от ног даже до главы, и тако над погребанием вчиненый монах ножом обрезав край мандии, иже по обоих краех, свив же мощи мандиею, укроем вкупе связанным обвивает мощи. Начен же от главы совершает кресты три, един у главы, вторый у персий, третий у колен, оставшею же частию двоих укров связует нозе его.

По сих же призывается священник чредный, иже возложив на ся епитрахиль и фимиам в кадильницу, творит начало обычное: Благословен Бог наш: И начинаем: Трисвятое. Пресвятая Троице: Отче наш: Яко Твое есть Царство:

### И обычныя тропари, сиесть:

Со духи праведных скончавшихся, душу раба Твоего (или, рабы Твоя), Спасе, упокой, сохраняя ю во блаженной жизни, яже у Тебе, Человеколюбче.

В покоищи Твоем, Господи, идеже вси святии Твои упокоеваются, упокой и душу раба Твоего (или, рабы Твоя), яко Един еси Человеколюбец.

Слава: Ты еси Бог, Сошедый во ад и узы окованных Разрешивый, Сам и душу раба Твоего (или, рабы Твоя) упокой.

И ныне: Едина Чистая и Непорочная Дево, Бога без семене рождашая, моли спастися души его (или, ея).

Таже диакон: Помилуй нас, Боже, по велицей милости Твоей, молим Ти ся, услыши и помилуй.

Господи, помилуй, **трижды**.

Еще молимся о упокоении души усопшаго раба Божия (или, усопшия рабы Божия) имярек, и о еже проститися ему (или, ей) всякому прегрешению, вольному же и невольному.

Господи, помилуй, **трижды**.

Яко да Господь Бог учинит душу его (или, ея), идеже праведнии упокоеваются.

Господи, помилуй, **трижды**.

Милости Божия, Царства Небеснаго, и оставления грехов его (или, ея) у Христа Безсмертнаго Царя и Бога нашего просим.

Подай, Господи.

Диакон: Господу помолимся. Господи, помилуй.

**Священник глаголет молитву сию:**

Боже духов, и всякия плоти, смерть поправый, и диавола упразднивый, и живот миру Твоему даровавый, Сам Господи, упокой душу усопшаго раба Твоего (или, рабы Твоея) имярек, в месте светле, в месте злачне, в месте покойне, отнюдуже отбеже болезнь, печаль и воздыхание, всякое согрешение, содеянное им (или, ею) словом, или делом, или помышлением, яко Благий Человеколюбец Бог прости, яко несть человек, иже жив будет, и не согрешит, Ты бо Един кроме греха, правда Твоя правда во веки, и слово Твое истина.

Возглас: Яко Ты еси воскресение, и живот, и покой усопшаго раба Твоего (или, усопшия рабы Твоея) имярек, Христе Боже наш, и Тебе славу возсылаем, со Безначальным Твоим Отцем, и Пресвятым, и Благим, и Животворящим Твоим Духом, ныне и присно, и во веки веков. Аминь.

**И отпуст.**

*Посем же вземше братия мощи умершаго относят в церковь, и аще убо священник есть отшедый брат, полагаются мощи его посреде храма, аще же простец, в притворе. Егда же придет время пети исходное пение над лежащим, идет кандилловжигатель, и ударяет в тяжкая железа, творя статии три, и тако собираются вся братия, и раздает им свечи сосудохранитель, и возжегше я.*

И диакону возгласившу: Благослови, владыко.

Священник же обычно начинает: Благословен Бог наш:

**И начинаем псалом 90:**

Живый в помощи Вышняго, в крове Бога Небеснаго водворится. Речет Господеви: Заступник Мой еси, и Прибежище мое, Бог мой и уповаю на Него. Яко Той избавит тя от сети ловчи и от словесе мятежна; плещма Своима осенит тя, и под криле Его надеешися; оружием обыдет тя истина Его. Не убоишися от страха ночнаго, от стрелы летящая во дни, от вещи во тьме преходящая, от сряща и беса полуденнаго. Падет от страны твоя тысяща, и тьма одесную тебе, к тебе же не приблизится. Обаче очима твоима смотриши, и воздаяние грешников узриши. Яко Ты, Господи, упование мое, Вышняго положил еси прибежище твое. Не приидет к тебе зло, и рана не приблизится телеси твоему. Яко Ангелом Своим заповесть о тебе сохранити тя во всех путех твоих. На руках возмут тя, да не когда преткнеши о камень ногу твою. На аспида и василиска наступиши, и попереши льва и змия. Яко на Мя упова, и избавлю и, покрыю и, яко позна имя Мое. Воззовет ко Мне, и услышу его, с ним есмь в скорби, изму его, и прославлю его. Долготою дней исполню его, и явлю ему спасение Мое.

## И поют братия:

Аллилуиа, во глас 8.

Стих 1: Блажен, егоже избрал и приял еси, Господи.

Стих 2: Память его в род и род.

Тропарь, глас тойже: Глубиною мудрости, человеколюбно вся строяй, и полезное всем подаваяй, Едине Содетелю, упокой, Господи, души раб Твоих, на Тя бо упование возложиша, Творца и Зиждителя и Бога нашего.

Слава, тойже. И ныне: Тя Стену и Пристанище имамы, и Молитвенницу благоприятну к Богу, Егоже родила еси, Богородице Безневестная, верных спасение.

*И стихословится первая статья непорочных, даже до Твой есмь азъ: На две бо статьи поются непорочны зде, в коемждо же конце стиха первая статьи приглаголем: Благословен еси, Господи: Егда же приидут в конечный стих, сиестъ: Во век не забуду оправданий Твоих: поют его трижды, к коемждо припевающе: Благословен еси, Господи: И абие ектения от диакона, и молитва втай от священника, и возглас. Посем начинаем вторую статью сице: Оправданий Твоих взысках: Твой есмь азъ, спаси мя. И на конце коегождо стиха: Твой есмь азъ, спаси мя. Егда же начнем: Призри на мя, и помилуй мя: поем псалом сей третиим гласом, на конце же коегождо стиха приглаголем: Во Царствии Твоем, Господи, помяни раба Твоего (или, рабу Твою). Конечный же стих, сиестъ: Жива будет душа моя: поем трижды, припевающе к коемждо: Во Царствии Твоем, Господи, помяни раба Твоего (или, рабу Твою). Непорочнии в путь: Благословен еси, Господи:*

Блажени непорочнии в путь, ходящи в законе Господни. Благословен еси, Господи:

Блажени испытующии свидения Его, всем сердцем взыщут Его. Благословен еси, Господи:

Не делаючи бо беззакония, в путех Его ходиша. Благословен еси, Господи:

Ты заповедал еси заповеди Твоя сохранить зело. Благословен еси, Господи:

Дабы исправился путие мои, сохранить оправдания Твоя. Благословен еси, Господи:

Тогда не постыжуся, внегда призрети ми на вся заповеди Твоя. Благословен еси, Господи:

Исповемся Тебе в правости сердца, внегда научити ми ся судьбам правды Твоя. Благословен еси, Господи:

Оправдания Твоя сохраню, не остави мене до зела. Благословен еси, Господи:

В чесом исправит юнейший путь свой? Внегда сохранить словеса Твоя. Благословен еси, Господи:

Всем сердцем моим взысках Тебе, не отрини мене от заповедей Твоих. Благословен еси, Господи:

В сердце моем скрых словеса Твоя, яко да не согрешу Тебе. Благословен еси, Господи:

Благословен еси, Господи, научи мя оправданием Твоим. Благословен еси, Господи:

Устнама моима возвестих вся судьбы уст Твоих. Благословен еси, Господи:

На пути свидений Твоих насладихся, яко о всяком богатстве. Благословен еси, Господи:

В заповедех Твоих поглумлюся, и уразумею пути Твоя. Благословен еси, Господи:

Во оправданиях Твоих поучуся, не забуду словес Твоих. Благословен еси, Господи:

Воздаждь рабу Твоему, живи мя, и сохраню словеса Твоя. Благословен еси, Господи:

Открой очи мои, и уразумею чудеса от закона Твоего. Благословен еси, Господи:

Пришлец аз есмь на земли, не скрый от мене заповеди Твоя. Благословен еси, Господи:

Возлюби душа моя возжелати судьбы Твоя на всякое время. Благословен еси, Господи:

Запретил еси гордым, прокляти уклоняющиеся от заповедей Твоих. Благословен еси, Господи:

Отъими от мене понос и уничижение, яко свидений Твоих взысках. Благословен еси, Господи:

Ибо седоша князи, и на мя клеветаху, раб же Твой глумляшеся во оправданиях Твоих. Благословен еси, Господи:

Ибо свидения Твоя поучение мое есть, и совети мои оправдания Твоя. Благословен еси, Господи:

Прильпе земли душа моя, живи мя по словеси Твоему. Благословен еси, Господи:

Пути моя возвестих, и услышал мя еси, научи мя оправданием Твоим. Благословен еси, Господи:

Путь оправданий Твоих вразуми ми, и поглумлюся в чудесах Твоих. Благословен еси, Господи:

Воздрема душа моя от уныния, утверди мя в словесах Твоих. Благословен еси, Господи:

Путь неправды остави от мене, и законом Твоим помилуй мя. Благословен еси, Господи:

Путь истины изволих, и судьбы Твоя не забудь. Благословен еси, Господи:

Прилепихся свидением Твоим, Господи, не посрами мене. Благословен еси, Господи:

Путь заповедей Твоих текох, егда расширил еси сердце мое. Благословен еси, Господи:

Законоположи мне, Господи, путь оправданий Твоих, и взыщу и выну. Благословен еси, Господи:

Вразуми мя, и испытаю закон Твой, и сохраню и всем сердцем моим. Благословен еси, Господи:

Настави мя на стезю заповедей Твоих, яко тую восхотех. Благословен еси, Господи:

Приклони сердце мое во свидения Твоя, а не в лихоимство. Благословен еси, Господи:

Отврати очи мои, еже не видети суеты, в пути Твоем живи мя. Благословен еси, Господи:

Постави рабу Твоему слово Твое в страх Твой. Благословен еси, Господи:

Отъими поношение мое, еже непщевах: яко судьбы Твоя благи. Благословен еси, Господи:

Се возжелал заповеди Твоя, в правде Твоей живи мя. Благословен еси, Господи:

И да приидет на мя милость Твоя, Господи, спасение Твое по словеси Твоему. Благословен еси, Господи:

И отвечаю поношающим ми слово: яко уповах на словеса Твоя. Благословен еси, Господи:

И не от'ими от уст моих словесе истинна до зела, яко на судьбы Твоя уповах. Благословен еси, Господи:

И сохраню закон Твой выну, в век и в век века. Благословен еси, Господи:

И хождах в широте, яко заповеди Твоя взысках. Благословен еси, Господи:

И глаголах о свидениях Твоих пред цари, и не стыдяхся. Благословен еси, Господи:

И поучахся в заповедех Твоих, яже возлюбих зело. Благословен еси, Господи:

И воздвигох руце мои к заповедем Твоим, яже возлюбих, и глумляхся во оправданиях Твоих. Благословен еси, Господи:

Помяни словеса Твоя рабу Твоему, ихже упование дал ми еси. Благословен еси, Господи:

То мя утеши во смирении моем, яко слово Твое живи мя. Благословен еси, Господи:

Гордии законопреступоваху до зела: от закона же Твоего не уклонихся. Благословен еси, Господи:

Помянух судьбы Твоя от века, Господи, и утешихся. Благословен еси, Господи:

Печаль прият мя от грешник, оставляющих закон Твой. Благословен еси, Господи:

Пета бяху мне оправдания Твоя, на месте пришельствия моего. Благословен еси, Господи:



Помянух в нощи имя Твое, Господи, и сохраних закон Твой. Благословен еси, Господи:

Сей бысть мне, яко оправданий Твоих взысках. Благословен еси, Господи:

Часть моя еси Господи, рех сохранить закон Твой. Благословен еси, Господи:

Помолихся лицу Твоему всем сердцем моим, помилуй мя по словеси Твоему. Благословен еси, Господи:

Помыслих пути Твоя, и возвратих нозе мои во свидения Твоя. Благословен еси, Господи:

Уготовихся и не смутихся сохранить заповеди Твоя. Благословен еси, Господи:

Ужя грешник обязашася мне, и закона Твоего не забых. Благословен еси, Господи:

Полунощи востах, исповедатися Тебе о судьбах правды Твоея. Благословен еси, Господи:

Причастник аз есмь всем боящимся Тебе, и хранящим заповеди Твоя. Благословен еси, Господи:

Милости Твоя Господи исполнь земля, оправданием Твоим научи мя. Благословен еси, Господи:

Благодсть сотворил еси с рабом Твоим, Господи, по словеси Твоему. Благословен еси, Господи:

Благости и наказанию, и разуму научи мя, яко заповедем Твоим веровах. Благословен еси, Господи:

Прежде даже не смирити ми ся, аз прегреших, сего ради слово Твое сохраних. Благословен еси, Господи:

Благ еси Ты, Господи, и благостию Твоею научи мя оправданием Твоим. Благословен еси, Господи:

Умножися на мя неправда гордых, аз же всем сердцем моим испытаю заповеди Твоя. Благословен еси, Господи:

Усырися яко млеко сердце их, аз же закону Твоему поучихся. Благословен еси, Господи:

Благо мне, яко смирил мя еси, яко да научуся оправданием Твоим. Благословен еси, Господи:

Благ мне закон уст Твоих, паче тысяч злата и сребра. Благословен еси, Господи:

Руце Твои сотвориште мя, и создасте мя; вразуми мя, и научуся заповедем Твоим. Благословен еси, Господи:

Боящиися Тебе узрят мя, и возвеселятся, яко на словеса Твоя уповах. Благословен еси, Господи:

Разумех Господи, яко правда судьбы Твоя, и воистинну смирил мя еси. Благословен еси, Господи:

Буди же милость Твоя, да утешит мя по словеси Твоему рабу Твоему. Благословен еси, Господи:

Да приидут мне щедроты Твоя, и жив буду, яко закон Твой поучение мое есть. Благословен еси, Господи:

Да постыдятся гордии, яко неправедно беззаконноваша на мя, аз же поглумлюся в заповедех Твоих. Благословен еси, Господи:

Да обратят мя боящиися Тебе, и ведающи свидения Твоя. Благословен еси, Господи:

Буди сердце мое непорочно во оправданиях Твоих, яко да не постыжуся. Благословен еси, Господи:

Исчезает во спасение Твое душа моя, на словеса Твоя уповах. Благословен еси, Господи:

Исчезоша очи мои в слово Твое, глаголюще: когда утетиши мя? Благословен еси, Господи:

Зане бых яко мех на слане, оправданий Твоих не забых. Благословен еси, Господи:

Колико есть дней раба Твоего, когда сотвориши ми от гонящих мя суд? Благословен еси, Господи:

Поведаша мне законопреступницы глумления, но не яко закон Твой, Господи. Благословен еси, Господи:

Вся заповеди Твоя истина, неправедно погнаша мя, помози ми. Благословен еси, Господи:

Вмале не скончаша мене на земли: аз же не оставих заповедей Твоих. Благословен еси, Господи:

По милости Твоей живи мя, и сохраню свидения уст Твоих. Благословен еси, Господи:

Во век, Господи, слово Твое пребывает на небеси. Благословен еси, Господи:

В род и род истина Твоя, основал еси землю, и пребывает. Благословен еси, Господи:

Учинением Твоим пребывает день, яко всяческая работна Тебе. Благословен еси, Господи:

Яко аще бы не закон Твой поучение мое был, тогда убо погибл бых во смирении моем. Благословен еси, Господи:

Во век не забуду оправданий Твоих, яко в них оживил мя еси. Благословен еси, Господи:

Диакон: Паки и паки миром Господу помолимся.

Господи, помилуй.

Еще молимся о упокоении души усопшаго раба Божия (или, усопшия рабы Божия) имярек, и о еже проститися ему (или, ей) всякому прегрешению, вольному же и невольному.

Господи, помилуй.

Яко да Господь Бог учинит душу его (или, ея), идеже праведнии упокоеваются.

Господи, помилуй.

Милости Божия, Царства Небеснаго, и оставления грехов его (или, ея) у Христа Безсмертнаго Царя и Бога нашего просим.

Подай, Господи.

Диакон: Господу помолимся. Господи, помилуй.

**Священник глаголет молитву сию:**

Боже духов, и всякия плоти, смерть поправый, и диавола упразднивый, и живот миру Твоему даровавый, Сам Господи, упокой душу усопшаго раба Твоего (или, усопшия рабы Твоея) имярек, в месте светле, в месте злачне, в месте покойне, отнюдуже отбеже болезнь, печаль и воздыхание, всякое согрешение содеянное им (или, ею) словом, или делом, или помышлением, яко Благий Человеколюбец Бог прости, яко несть человек, иже жив будет, и не согрешит, Ты бо Един кроме греха, правда Твоя правда во веки, и слово Твое истина.

Возглас: Яко Ты еси воскресение, и живот, и покой усопшаго раба Твоего (или, усопшия рабы Твоея) имярек, Христе Боже наш, и Тебе славу возсылаем, со Безначальным Твоим Отцем, и

Пресвятым, и Благим, и Животворящим Твоим Духом, ныне и присно, и во веки веков, аминь.

**И начинаем вторую статью:**

Твой есмь аз, спаси мя, яко оправданий Твоих взысках. Твой есмь аз, спаси мя.

Мене ждаша грешницы погубити мя, свидения Твоя разумех. Твой есмь аз, спаси мя.

Всякия кончины видех конец, широка заповедь Твоя зело. Твой есмь аз, спаси мя.

Коль возлюбих закон Твой, Господи, весь день поучение мое есть. Твой есмь аз, спаси мя.

Паче враг моих умудрил мя еси заповедию Твоею, яко в век моя есть. Твой есмь аз, спаси мя.

Паче всех учащих мя разумех, яко свидения Твоя поучение мое есть. Твой есмь аз, спаси мя.

Паче старец разумех, яко заповеди Твоя взысках. Твой есмь аз, спаси мя.

От всякаго пути лукава возбраних ногам моим, яко да сохраню словеса Твоя. Твой есмь аз, спаси мя.

От судеб Твоих не уклонихся, яко Ты законоположил ми еси. Твой есмь аз, спаси мя.

Коль сладка гортани моему словеса Твоя, паче меда устом моим. Твой есмь аз, спаси мя.

От заповедей Твоих разумех, сего ради возненавидех всяк путь неправды. Твой есмь аз, спаси мя.

Светильник ногама моима закон Твой, и свет стезям моим. Твой есмь аз, спаси мя.

Клянся, и поставих сохранить судьбы правды Твоя. Твой есмь аз, спаси мя.

Смирися до зела, Господи, живи мя по словеси Твоему. Твой есмь аз, спаси мя.

Вольная уст моих благоволи же, Господи, и судьбам Твоим научи мя. Твой есмь аз, спаси мя.

Душа моя в руку Твоею выну, и закона Твоего не забудю. Твой есмь аз, спаси мя.

Положиша грешницы сеть мне, и от заповедей Твоих не заблудих. Твой есмь аз, спаси мя.

Наследовах свидения Твоя во век, яко радование сердца моего суть. Твой есмь аз, спаси мя.

Приклоних сердце мое сотворити оправдания Твоя в век за воздаяние. Твой есмь аз, спаси мя.

Законопреступный возненавидех, закон же Твой возлюбих. Твой есмь аз, спаси мя.

Помощник мой и Заступник мой еси Ты, на словеса Твоя уповах. Твой есмь аз, спаси мя.

Уклонитесь от мене лукавнующии, и испытаю заповеди Бога моего. Твой есмь аз, спаси мя.

Заступи мя по словеси Твоему, и жив буду, и не посрами мене от чаяния моего. Твой есмь аз, спаси мя.

Помози ми, и спасуся, и поучуся во оправданиях Твоих выну. Твой есмь аз, спаси мя.

Уничжил еси вся отступающыя от оправданий Твоих, яко неправедно помышление их. Твой есмь аз, спаси мя.

Преступающыя непщевах вся грешныя земли, сего ради возлюбих свидения Твоя. Твой есмь аз, спаси мя.

Пригвозди страху Твоему плоти моя, от судеб бо Твоих убояхся. Твой есмь аз, спаси мя.

Сотворих суд и правду, не предаждь мене обидящим мя. Твой есмь аз, спаси мя.

Восприими раба Твоего во благо, да не оклеветают мене гордии. Твой есмь аз, спаси мя.

Очи мои исчезосте во спасение Твое, и в слово правды Твоея. Твой есмь аз, спаси мя.

Сотвори с рабом Твоим по милости Твоей, и оправданием Твоим научи мя. Твой есмь аз, спаси мя.

Раб Твой есмь аз, вразуми мя, и увем свидения Твоя. Твой есмь аз, спаси мя.

Время сотворити Господеви, разориша закон Твой. Твой есмь аз, спаси мя.

Сего ради возлюбих заповеди Твоя паче злата и топазия. Твой есмь аз, спаси мя.

Сего ради ко всем заповедем Твоим направляхся, всяк путь неправды возненавидех. Твой есмь аз, спаси мя.

Дивна свидения Твоя, сего ради испытана я душа моя. Твой есмь аз, спаси мя.

Явление словес Твоих просвещает, и вразумляет младенцы. Твой есмь аз, спаси мя.

Уста моя отверзох, и привлекох дух, яко заповедей Твоих  
желах. Твой есмь аз, спаси мя.

Призри на мя и помилуй мя, по суду любящих имя Твое. Во  
Царствии Твоем, Господи, помяни раба Твоего (или, рабу Твою).

Стопы моя направи по словеси Твоему, и да не обладает мною  
всякое беззаконие. Во Царствии Твоем, Господи, помяни раба  
Твоего (или, рабу Твою).

Избави мя от клеветы человеческия, и сохранию заповеди Твоя. Во  
Царствии Твоем, Господи, помяни раба Твоего (или, рабу Твою).

Лице Твое просвети на раба Твоего, и научи мя оправданием  
Твоим. Во Царствии Твоем, Господи, помяни раба Твоего (или, рабу  
Твою).

Исходища водная изведосте очи мои, понеже не сохраних закона  
Твоего. Во Царствии Твоем, Господи, помяни раба Твоего  
(или, рабу Твою).

Праведен еси, Господи, и прави суди Твои. Во Царствии Твоем,  
Господи, помяни раба Твоего (или, рабу Твою).

Заповедал еси правду свидения Твоя, и истину зело. Во Царствии  
Твоем, Господи, помяни раба Твоего (или, рабу Твою).

Истаяла мя есть ревность Твоя, яко забыша словеса Твоя врази  
мои. Во Царствии Твоем, Господи, помяни раба Твоего (или, рабу  
Твою).

Разжжено слово Твое зело, и раб Твой возлюбил е. Во Царствии  
Твоем, Господи, помяни раба Твоего (или, рабу Твою).

Юнейший аз есмь и уничижен, оправданий Твоих не забуду. Во  
Царствии Твоем, Господи, помяни раба Твоего (или, рабу Твою).



Правда Твоя правда во век, и закон Твой истина. Во Царствии Твоем, Господи, помяни раба Твоего (или, рабу Твою).

Скорби и нужды обретоша мя, заповеди Твоя поучение мое. Во Царствии Твоем, Господи, помяни раба Твоего (или, рабу Твою).

Правда свидения Твоя в век, вразуми мя, и жив буду. Во Царствии Твоем, Господи, помяни раба Твоего (или, рабу Твою).

Воззвах всем сердцем моим, услыши мя, Господи, оправдания Твоя взыщу. Во Царствии Твоем, Господи, помяни раба Твоего (или, рабу Твою).

Воззвах Ти, спаси мя, и сохраню свидения Твоя. Во Царствии Твоем, Господи, помяни раба Твоего (или, рабу Твою).

Предварих в безгодии и воззвах, на словеса Твоя уповах. Во Царствии Твоем, Господи, помяни раба Твоего (или, рабу Твою).

Предваристе очи мои ко утру, поучитися словесем Твоим. Во Царствии Твоем, Господи, помяни раба Твоего (или, рабу Твою).

Глас мой услыши, Господи, по милости Твоей, по судьбе Твоей живи мя. Во Царствии Твоем, Господи, помяни раба Твоего (или, рабу Твою).

Приближишася гонящие мя беззаконием, от закона же Твоего удалишася. Во Царствии Твоем, Господи, помяни раба Твоего (или, рабу Твою).

Близ еси Ты, Господи, и вси путие Твои истина. Во Царствии Твоем, Господи, помяни раба Твоего (или, рабу Твою).

Исперва познах от свидений Твоих, яко в век основал я еси. Во Царствии Твоем, Господи, помяни раба Твоего (или, рабу Твою).

Виждь смирение мое, и измени мя, яко закона Твоего не забуду. Во Царствии Твоем, Господи, помяни раба Твоего (или, рабу Твою).

Суди суд мой, и избави мя, словесе ради Твоего живи мя. Во Царствии Твоем, Господи, помяни раба Твоего (или, рабу Твою).

Далече от грешник спасение, яко оправданий Твоих не взыскаша. Во Царствии Твоем, Господи, помяни раба Твоего (или, рабу Твою).

Щедроты Твоя многи, Господи, по судьбе Твоей живи мя. Во Царствии Твоем, Господи, помяни раба Твоего (или, рабу Твою).

Мнози изгонящи мя, и стужающи ми, от свидений Твоих не уклонихся. Во Царствии Твоем, Господи, помяни раба Твоего (или, рабу Твою).

Видех неразумевающыя, и истаях, яко словес Твоих не сохраниша. Во Царствии Твоем, Господи, помяни раба Твоего (или, рабу Твою).

Видь, яко заповеди Твоя возлюбих, Господи, по милости Твоей живи мя. Во Царствии Твоем, Господи, помяни раба Твоего (или, рабу Твою).

Начало словес Твоих истина, и во век вся судьбы правды Твоя. Во Царствии Твоем, Господи, помяни раба Твоего (или, рабу Твою).

Князи погнаша мя туне, и от словес Твоих убояся сердце мое. Во Царствии Твоем, Господи, помяни раба Твоего (или, рабу Твою).

Возрадуюся аз о словесех Твоих, яко обретаяй корысть многу. Во Царствии Твоем, Господи, помяни раба Твоего (или, рабу Твою).

Неправду возненавидех и омерзих, закон же Твой возлюбих. Во Царствии Твоем, Господи, помяни раба Твоего (или, рабу Твою).

Седмерицею днем хвалих Тя о судьбах правды Твоя. Во Царствии Твоем, Господи, помяни раба Твоего (или, рабу Твою).

Мир мног любящим закон Твой, и несть им соблазна. Во Царствии Твоем, Господи, помяни раба Твоего (или, рабу Твою).

Чаях спасения Твоего, Господи, и заповеди Твоя возлюбих. Во Царствии Твоем, Господи, помяни раба Твоего (или, рабу Твою).

Сохрани душа моя свидения Твоя и возлюби я зело. Во Царствии Твоем, Господи, помяни раба Твоего (или, рабу Твою).

Сохраних заповеди Твоя и свидения Твоя, яко вси путие мои пред Тобою, Господи. Во Царствии Твоем, Господи, помяни раба Твоего (или, рабу Твою).

Да приблизится моление мое пред Тя, Господи, по словеси Твоему вразуми мя. Во Царствии Твоем, Господи, помяни раба Твоего (или, рабу Твою).

Да внидет прошение мое пред Тя, Господи, по словеси Твоему избави мя. Во Царствии Твоем, Господи, помяни раба Твоего (или, рабу Твою).

Отрыгнут устне мои пение, егда научиши мя оправданием Твоим. Во Царствии Твоем, Господи, помяни раба Твоего (или, рабу Твою).

Провещает язык мой словеса Твоя, яко вся заповеди Твоя правда. Во Царствии Твоем, Господи, помяни раба Твоего (или, рабу Твою).

Да будет рука Твоя, еже спасти мя, яко заповеди Твоя изволих. Во Царствии Твоем, Господи, помяни раба Твоего (или, рабу Твою).

Возжелах спасение Твое, Господи, и закон Твой поучение мое есть. Во Царствии Твоем, Господи, помяни раба Твоего (или, рабу Твою).

Жива будет душа моя, и восхвалит Тя, и судьбы Твоя помогут мне. Во Царствии Твоем, Господи, помяни раба Твоего (или, рабу Твою).

Заблудих, яко овча погибшее, взыщи раба Твоего, яко заповедей Твоих не забуду. Во Царствии Твоем, Господи, помяни раба Твоего (или, рабу Твою).

И абие: Благословен еси Господи, научи мя оправданием Твоим.

Святых лик обрете источник жизни, и дверь райскую, да обрящу и аз путь покаянием; погибшее овча аз есмь, воззови мя, Спасе, и спаси мя. Благословен еси, Господи:

Агнца Божия проповедавшие, и заклани бывше якоже агнцы, и к жизни нестареемей святости, и присносущней преставльшися, Того прилежно мученицы молити, долгов разрешение нам даровати. Благословен еси, Господи:

В путь узкий хождшии прискорбный, вси в житии крест яко ярем взявшии, и Мне последовавшии верою, приидите насладитесь, ихже угодовах вам почестей, и венцов небесных. Благословен еси, Господи:

Образ есмь неизреченныя Твоея славы, аще и язвы ношу прегрешений, ущедри Твое создание, Владыко, и очисти Твоим благоутробием, и возжеленное отечество подаждь ми, рая паки жителя мя сотворяя. Благословен еси Господи:

Древле убо от не сущих Создавый мя, и образом Твоим Божественным почтый, преступлением же заповеди, паки мя Возвративый в землю, от неяже взят бых, на еже по подобию возведи, древнею добротою возобразитися. Благословен еси, Господи:

Упокой, Боже, рабы Твоя, и учини я в раи, идеже лица святых, Господи, и праведницы сияют яко светила, усопшыя рабы Твоя упокой, презирая их вся согрешения.

Слава: Трисиятельное Единого Божества благочестно поем, вопиюще: свят еси, Отче Безначальный, Собезначальный Сыне, и Божественный Душе, просвети нас, верою Тебе служащих, и вечного огня исхити.

И ныне: Радуйся, Чистая, Бога плотию рождающая во спасение всех, Еюже род человеческий обрете спасение, Тобою да обрящем рай, Богородице Чистая, Благословенная. Аллилуиа, трижды.

И ектения такожде от диакона:

и молитва якоже выше речеся от священника.

И по возгласе, тропарь, глас 5:

Покой Спасе наш, с праведными рабы Твоя, и сия всели во дворы Твоя, якоже есть писано, презирая яко Благ прегрешения их, вольная и невольная, и вся яже в ведении и не в ведении, Человеколюбче.

Слава, и ныне, Богородичен: От Девы возсиявый миру, Христе Боже, сыны света Тоя показавый, помилуй нас.

По Богородичне же читается псалом 50: Помилуй мя, Боже:

И тако начинаем антифоны сия:

Антифон 1, глас 1:

Внегда скорбети ми, услыши моя болезни, Господи, Тебе зову.

Пустынным непрестанное божественное желание бывает, мира сущим суетного кроме.

Слава: Святому Духу честь и слава, якоже Отцу подобает, купно же и Сыну; сего ради да поим Троице единойдержавие.

И ныне, тойже.

### Таже стихиры святого Феофана, глас 1.

#### Подобен: Прехвальнии мученицы:

Тебе, Спасе, молимся, Твоего сладкаго причастия преставльшагося сподоби, и всели в скиниях праведных, во обителях святых Твоих, в небесных селениях, благоутробием Твоим презирая его прегрешения, и подая ему упокоение.

Никтоже безгрешен, никтоже от человек бысть, токмо Ты Едине Безсмертне; тем раба Твоего, Боже Щедрый, во свете учини, с ликостоянии Ангел Твоих, благоутробием Твоим презирая беззакония, и подая ему упокоение.

Паче видимых суть Твоя, Спасе, обещания, яже око не виде, и ухо не слыша, и на сердце не възде, Владыко; ихже сладчайшаго причастия получитьи благоволи, к Тебе преставльшемуся, и подаждь ему жизнь вечную.

Слава, и ныне: Христа умоли, Твое рождение, Мати Дево, прегрешений прощение дати рабу Твоему (или, рабе Твоей), Тя Богородицу благочестно проповедававшему, и словом истинным известившему, и светлости святых, и веселия сподобити во Царствии Своем.

#### Антифон 2, глас 2:

На небо очи пуцаю моего сердца, к Тебе, Спасе, спаси мя Твоим осиянием.

Помилуй нас, согрешающих Тебе много на всякий час, о Христе мой, и даждь образ прежде конца покаяться Тебе.

Слава: Святому Духу, еже царствовати подобает, освящати, подвизати тварь; Бог бо есть единосущен Отцу и Слову.

И ныне, тойже.

## Стихиры, глас 2.

### Подобен: Егда от древа:

Стремление смертное и тлю Твоею живоносною смертию низложил еси, Владыко, всем же источил еси живот вечный, и мертвых воскресение смертным даровал еси. Темже Тебе молимся, Спасе, упокой верою к Тебе преставльшагося, и сладчайшая Твоя доброты сего (или, сию) сподоби, Человеколюбче.

Да человеки общники Божественного Царствия соделаеши, Крест претерпел еси, смерть вольную восприим; сего ради молимся Твоему благоутробию: причастника яви Царствия Твоего верою к Тебе преставльшагося, и сладчайшая Твоя доброты сего (или, сию) сподоби, Человеколюбче.

Трепетом ужасным и страшным, судилищу Твоему предстояще от века мертвии, ответа ожидают праведнаго Твоего, Спасе, и божественнаго чают правосудия; тогда пощади, Владыко Спасе, раба Твоего (или, рабу Твою), верою к Тебе преставльшагося, и присносущнаго наслаждения Твоего и блаженства сподоби.

Слава, и ныне, Богородичен: Евы праматере, Чистая, Ты долг, заченши Бога, отдала еси, нетление же и воскресение верным дарующа, и безсмертия славою венчающа Тя величающыя; Егоже ныне молящи не престай, сего (или, сию) во свете вчинити Своя светлости, Богоневестная.

## Антифон 3, глас 3:

Плен Сионь Ты из'ял еси от Вавилона, и мене от страстей к животу привлецы, Слове.

В юг сеющи слезами божественными, жнут класы радостию присноживотия.

Слава: Святому Духу всякое благодарие, якоже Отцу и Сыну сооблищает, в Немже вся живут, и движутся.

И ныне, тойже.

### Стихиры, глас 3.

Подобен: образу Креста:

Славлю Крест Твой Честный, имже живот даровася, и пищи восприятие, верою и любовью Тя поющим, Едине Многомилостиве. Темже вопием Ти, Христе Боже: преставльшагося (или, преставльшуюся) от нас упокой, идеже всех есть веселящихся жилище в Тебе, еже славити Твое Божество.

Едине Милостиве и Благоутробне, имея непостижимую благи пучину, и ведый естество человеческое, еже соделал еси, Тебе молим, Христе Боже: преставльшагося от нас упокой, идеже всех есть веселящихся жилище в Тебе, еже славити Твое Божество.

Уснувый во гробе яко человек, силою непобедимую Твоею, яко Бог воскресил еси во гробех спящия, немолчно песнь Ти приносящия. Тем вопием Ти, Христе Боже: преставльшагося от нас упокой, идеже всех есть веселящихся жилище в Тебе, еже славити Твое Божество.

Слава, и ныне: Свещу умную Тя, носящую свет Божества, совокупльшийся дебелству человеческого существа, Богородице, вси свемы; тем Твоего моли Сына и Бога, преставльшагося в сладости упокоити, идеже всех есть веселящихся жилище, Чистая, еже славити Тя, Всенепорочную.

### Антифон 4, глас 4:

От юности моя мнози борют мя страсти, но Сам мя заступи, и спаси, Спасе мой.



Ненавидящие Сиона посрамятся от Господа: яко трава бо огнем будете изсохше.

Слава: Святым Духом всяка душа живится, и чистотою возвышается, светлеется Троическим Единством, священнотайне.

И ныне, тойже.

#### Стихиры, глас 4.

**Подобен:** Дал еси знамение:

Воистинну страшно есть смертное таинство, како душа от тела нуждею разлучается, от счинения и сочетания естественнейший союз Божиим хотением отсекается. Темже Тя молим: преставльшагося упокой в селениях праведных Твоих, Жизнодавче Человеколюбче.

Сон является верующим смерть, Тебе положену во Гробе, всеми Владычествующему, и смертную державу Разрушившему, и Упразднившему ея насилие многолетное. Темже Тя молим: преставльшагося вчини в селениях святых Твоих, в праведных светлостех.

Ты правда же и освящение нам был еси, и душам избавление: Отцу бо привел еси оправданы и избавлены, восприим наше должное запрещение. И ныне молим Тя, преставльшагося упокой в радости и светлости святых, Благодетелю Спасе наш.

Слава, и ныне, Богородичен: Словесем последующе богоглаголивых, Всенепорочная, Богородицу Тя мудрствуем: Бога бо родила еси воплотившагося недомысленно, избавльшаго нас плененных прегрешеньми. Темже ныне молим Тя: преставльшагося раба Твоего (или, рабу Твою) Своими сияньми просвети, Пречистая.

#### Антифон 5, глас 5:

Внегда скорбети мне, Давидски пою Тебе, Спасе мой: избави душу мою от языка лъстиваго.

Пустынным живот блажен есть, божественным рачением воскриляющымся.

Слава: Святым Духом одержатся вся видимая же с невидимыми: Самодержавен бо сый, Троицы Един есть неложно.

И ныне, тойже.

### Стихиры, глас 5.

**Подобен:** Радуйся, постником:

Зарю Лица Твоего, Христе, преставльшагося яко Щедр озари, вселяя его (или, ю) в место злачно, на водах Твоего чистаго и божественнаго покоя, в желанных недрах Авраама праотца, идеже свет Твой чистый является, и проливаются источники благодости, идеже ликуют ясно веселящися праведных лица о Твоей благодости; с нимиже учини раба Твоего (или, рабу Твою), подавая велию милость.

Пети всесличным гласом, славословящаго Твою державу благослови, Щедре, преставльшагося от привременных к Тебе Владыце всех и Человеколюбцу, дая ему (или, ей) красотою Твоея доброты освящаться, и сладкаго и краснаго причастия Твоего восприяти же и наслаждаться, чистши, идеже окрест Престола Твоего ликуют Ангели, и святых собори радостно обстоят; с нимиже рабу Твоему (или, рабе Твоей) упокоение подаждь, и велию милость.

Идеже пророков лик, апостолов и мучеников чинове, и всех от века оправдавшихся Твоею спасительною Страстию и Кровию, еуже искупил еси плененнаго человека, тамо верою усопшаго упокой, яко Человеколюбец, прощаяй и прегрешения: Един бо Безгрешен на земли пожил еси Свят воистинну, и Един в мертвых Свободь.

Темже Твоему рабу (или, Твоей рабе) упокоение подаждь, и велию милость.

Слава, и ныне, Богородичен: Законом греховным нас порабощенных свободила еси, Владычице, во утробе Законоположителя и Царя Христа заченшая, Едина Мати Дево, Имже оправдаемся, даром же и благодатию; Егоже ныне моли, души поющих Тя Богоматерь, учинити в книзе животней, яко да ходатайством Твоим спасешся, Всенепорочная, Сына Твоего желаемое получим избавление, Тому покланяющемся, подающему миру велию милость.

### Антифон 6, глас 6:

На небо очи мои возвожу к Тебе, Слове: ущедри мя, да живу Тебе.

Помилуй нас уничиженных, устрояя благопотребныя Твоя сосуды, Слове.

Слава: Святому Духу, всякая всеспасительная вина, аще коему Сей по достоянию дхнет, скоро возьмет от земных, восперяет, возвращает, устрояет горе.

И ныне, тойже.

### Стихиры, глас 6.

**Подобен:** Всю отложивше:

Имей непостижимое еже к нам благоутробие, и источник неистощимый божественныя благостыни, Многомилостиве, к Тебе, Владыко, пришедшаго в земли живых всели, селений возлюбленных и желаемых одержание даря, всегда пребывающее, Ты бо за всех излиал еси Кровь Твою, Христе, и живоносною ценою мир свободил еси.

Умерщвление претерпел еси животворящее волею, и живот источил еси, и наслаждение присносущное верным дал еси, в

немже учини усопшаго о надежди воскресения, сего (или, сея) прегрешения вся прощая благию, яко Един Безгрешен, Един Благ и Человеколюбец, да всеми поется имя Твое, Христе, и спасеннии славим человеколюбие Твое.

Живыми обладающаго, богонаначальною властью, и мертвыми владычествующаго, Тебе, Христе, знающе молим: вернаго раба Твоего (или, верную рабу Твою), к Тебе Единому Благодателю отшедшаго, того (или, отшедшую, ту) упокой со избранными Твоими, Человеколюбче, в месте прохладения, во святых светлостех, Волитель бо милости еси и спасаеши яко Бог, ихже по образу Твоему создал еси, Едине Многомилостиве.

Слава, и ныне, Богородичен: Явилася еси пребывание боголепное, Пресвятая, Бога бо вместила еси, и Бога родила еси, Неискусобрачная, во двюю существу, во единой же ипостаси; Того моли Единороднаго и Первенца, Тя Деву Непорочную и по рождестве сохраняющаго, душу упокоити верою усопшаго (или, усопшия) во свете, в нетленной светлости и блаженстве.

#### Антифон 7, глас 7:

Плен Сионь от лести обратив, и мене, Спасе, оживи, из'имая работныя страсти.

В юг сеяй скорби постныя со слезами, сей радостныя пожнет рукояти присноживопитания.

Слава: Святым Духом, источник божественных сокровищ, от Негоже премудрость, разум, страх, Тому хвала, и слава, честь и держава.

И ныне, тойже.

#### Стихиры, глас 7.

Подобен: О всех небрегше:

Умерщвлен виден был еси на Кресте, Едине Безсмертне, и во гробе яко смертен положился еси, умерщвления и тли и смерти человеки избавляя, но яко пучина благоутробия сый неистошима, и источник благодати, душу раба Твоего преставльшагося (или, рабы Твоея преставльшияся) от нас упокой.

Нетленную Твоею добротою и сладостию, Твоея красоты лучами просвещатися к Тебе преставльшагося, Блаже, сподоби, в невещественном светолитии светоявления Твоего, со Ангелы ликовствующу о Тебе Владыце, и Царе Славы, и Господе.

Яко неизживаемое имейя даров великолепие, яко сокровище неоскудное богатя благодыни, к Тебе преставльшагося (или, преставльшуюся) яко Бог всели во стране избранных Твоих, на месте ослабы, в дому славы Твоея, в наслаждении райстем, в девственном чертозе, яко Благоутробен.

Слава, и ныне, Богородичен: Закона исполнение раждаеши, Избавителя, плоть бывшаго, не бо бысть сущым прежде в законе оправдание, но нас Христос ныне распенся оправдá. Яко убо имущая дерзновение, яко Мати, моли Сына Твоего Благоутробнаго, душу упокоити благочестно преставльшагося, Всепетая.

### Антифон 8, глас 8:

От юности моя враг мя искушает, сладъями палит мя, аз же надеяся на Тя, Господи, побеждаю сего.

Ненавидящии Сиона да будут убо прежде исторжения яко трава, ссечет бо Христос выя их усечением мук.

Слава: Святым Духом, еже жити всяческим, Свет от Света, Бог велик, со Отцем поем Ему и Словом.

И ныне, тойже.

### Стихиры, глас 8.

**Подобен:** О преславного чудесе!

Царски мне подписал еси свобождение, шары червленными персты Твоя окровавив, Владыко, и обагрив Твоею Кровию, и ныне Тя верою молим, с первородными Твоими причти, и праведных Твоих радости сподоби улучшить прешедшаго к Тебе Благоутробному.

Священноначальствовав яко человек, заклав Себе, приношение принесл еси Отцу, человека от тли из'имая; преставльшагося убо яко Человеколюбец, во стране живущих учини, идеже потоцы наслаждения проливаются, идеже источницы присносущнии истекают.

Глубиною неизреченная Твоя мудрости, определяеши живот, и провидиши смерть, и к житию иному преселяеши человека; тем егоже (или, юже) приял еси ныне, учини на водах упокоения, в светлости святых Твоих светов, идеже глас радования и хваления.

Слава, и ныне, Богородичен: Яко заченшая Безначальнаго Слова Божия и Бога, Матерним Твоим дерзновением прилежно моли, учинити раба Твоего (или, рабу Твою), идеже ликование неразрушимое веселящихся, и хвалящих Тя, идеже светлости вечнующья, и сладкий глас празднующих, Богородительнице.

Диакон: Паки и паки: И прочее яко обычно.

**И по возгласе кондак, глас 8:**

Со святыми упокой, Христе, душу раба твоего (или, рабы Твоея), идеже несть болезнь, ни печаль, ни воздыхание, но жизнь бесконечная.

Икос: Сам Един еси Безсмертный, Сотворивый и Создавый человека, земнии убо от земли создахомся, и в землю туюжде пойдём, якоже повелел еси, Создавый мя, и Рекий ми: яко земля еси, и в землю от'идеши, аможе вси человецы пойдём, надгробное рыдание творяще песнь: аллилуиа.

И паки: Со святыми упокой:

**И абие блаженна, глас 2:**

Во Царствии Твоем, егда приидеши, помяни нас, Господи.

Блажени нищии духом, яко тех есть Царство Небесное.

Блажени плачущии, яко тии утешатся.

Блажени кротции, яко тии наследят землю.

Блажени алчущии и жаждущии правды, яко тии насытятся.

Блажени милостивии, яко тии помиловани будут.

Помяни, Благоутробне, и нас, якоже помянул еси разбойника, во Царствии Небеснем.

Блажени чистии сердцем, яко тии Бога узрят.

Вси боящиися Бога тамо возвеселятся о Нем во Царствии Небеснем.

Блажени миротворцы, яко тии сынове Божии нарекутся.

Постничеством работавшаго Тебе, Христе, и православием на земли, прослави, Спасе, на небесех.

Блажени изгнани правды ради, яко тех есть Царство Небесное.

Верую и надеждою боголепно, и любовию пожившаго на земли, прослави, Спасе, на небесех.

Блажени есте, егда поносят вам, и изженут, и рекут всяк зол глагол, на вы лжуще Мене ради.

Упокой раба Твоего (или, рабу Твою), Боже, со святыми яко Благ, во Царствии Небеснем.

Радуйтесь и веселитесь, яко мзда ваша многа на небесех.

Мир оставльшаго и в честнем жительстве пожившаго благочестно, прослави, Спасе, на небесех.

Слава: Едино Богоначалие, благочестивии имуще веры, в Трех Лицех славим благоговейно.

И ныне, Богородичен: Все ублажаем Тя, Чистая, бессеменно бо родила еси плотию Бога, и Царя Небеснаго.

По сих возглашает диакон: Вонмем.

Священник: Мир всем. Чтец: И духови твоему.

Диакон: Премудрость, вонмем.

Чтец, прокимен, глас 6:

Блажен путь, вонъже идеши, брате, днесь, яко уготовася тебе место покоя. Стих: Обратися, душе моя, в покой твой, яко Господь благодействова тя.

Диакон: Премудрость.

Чтец: К Солуняном Послания святаго апостола Павла чтение.

Диакон: Вонмем.

**Чтец четет Апостол (зачало 270):**

Братие, не хочу вас не ведети о умерших, да не скорбите, якоже и прочии не имущии упования. Аще бо веруем, яко Иисус умре и воскрес, тако и Бог умершыя о Иисусе приведет с Ним. Сие бо вам



глаголем словом Господним, яко мы живущии оставшии в пришествие Господне, не имамы предварити умерших. Яко Сам Господь в повелении, во гласе Архангелове, и в трубе Божии снидет с небесе, и мертвии о Христе воскреснут первее, потом же мы живущии оставшии купно с ними восхищени будем на облацех, в сретение Господне на воздусе, и тако всегда с Господем будем.

Священник: Мир ти. Чтец: И духови твоему.

Аллилуиа, глас 6:

Блажен, егоже избрал и приял еси, Господи.

Диакон: Премудрость, прости, услышим Святаго Евангелиа.

Священник: Мир всем. Чтец: И духови твоему.

Священник: От Иоанна Святаго Евангелиа чтение.

Чтец: Слава Тебе, Господи, слава Тебе.

Диакон: Вонмем. (Зачало 16).

Рече Господь ко пришедшим к Нему иудеом: аминь аминь глаголю вам, яко слушай словесе Моего и веруй Пославшему Мя, имать живот вечный, и на суд не придет, но придет от смерти в живот. Аминь аминь глаголю вам, яко грядет час, и ныне есть, егда мертвии услышат глас Сына Божия, и услышавше оживут. Якоже бо Отец имать живот в Себе, тако даст и Сынови живот имети в Себе. И область даст Ему и Суд творити: яко Сын Человекъ есть, не дивитесь сему. Яко грядет час, воньже вси сущии во гробех услышат глас Сына Божия. И изыдут сотворшии благая в воскрешение живота, а сотворшии злая в воскрешение суда. Не могу Аз о Себе творити ничесоже, якоже слышу, сужду, и Суд Мой праведен есть, яко не ишу воли Моя, но воли пославшего Мя Отца.

По Евангелии же братия поют: Слава Тебе, Господи, слава Тебе.

Диакон же: Помилуй нас, Боже, по велицей милости Твоей, молим Ти ся, услыши и помилуй.

Господи, помилуй, **трижды**.

Еще молимся о упокоении души усопшаго раба Божия (или, усопшия рабы Божия) имярек, и о еже проститися ему (или, ей) всякому прегрешению, вольному же и невольному.

Господи, помилуй, **трижды**.

Яко да Господь Бог учинит душу его (или, ея), идеже праведнии упокоеваются.

Господи, помилуй, **трижды**

Милости Божия, Царства Небеснаго, и оставления грехов его (или, ея) у Христа Безсмертнаго Царя и Бога нашего просим.

Поддай, Господи.

Диакон: Господу помолимся. Господи, помилуй.

**Таже молитва от священника велегласно глаголется:**

Боже духов и всякия плоти, смерть поправый, и диавола упразднивый, и живот миру Твоему даровавый, Сам Господи, упокой душу усопшаго раба Твоего (или, рабы Твоя) имярек, в месте светле, в месте злачне, в месте покойне, отнюдуже отбеже болезнь, печаль и воздыхание, всякое согрешение, содеянное им (или, ею), словом, или делом, или помышлением, яко Благий Человеколюбец Бог прости, яко несть человек, иже жив будет, и не согрешит, Ты бо Един кроме греха, правда Твоя правда во веки, и слово Твое истина.

Возглас: Яко Ты еси Воскресение, и Живот, и Покой усопшаго раба Твоего (или, усопшия рабы Твоя) имярек, Христе Боже наш, и Тебе славу возсылаем, со Безначальным Твоим Отцем, и

Пресвятым, и Благим, и Животворящим Твоим Духом, ныне и присно, и во веки веков, аминь.

Посем бывает целование по чину, и поются настоящия стихиры, глас 2.

Подобен: Егда от древа:

Приидите, последнее целование дадим, братие, умершему (или, умершей), благодаряще Бога, сей бо (или, сия бо) оскуде от сродства своего, и ко гробу тщится, не ктому пекийся о суетных, и о многострастной плоти. Где ныне сродницы же и друзи? Се разлучаемся. Егоже (или, юже) упокоити, Господу помолимся.

Кое разлучение, о братие, кое рыдание в настоящем часе, приидите убо, целуйте бывшего (или, бывшую) вмале с нами, предается бо гробу, камением покрывается, во тьму вселяется, с мертвыми погребается, и всех сродников и друзей ныне разлучается. Егоже (или, юже) упокоити, Господу помолимся.

Ныне житейское лукавое разрушается торжество суеты: дух бо оскуде от селения, брение очернися, сосуд раздрася, безгласен, нечувствен, мертвен, недвижимъ. Егоже (или, юже) посылающе гробу, Господу помолимся дати сему (или, сей) во веки упокоение.

Яков живот наш есть: цвет, и дым, и роса утренняя воистинну. Приидите убо, узрим на гробех ясно, где доброта телесная, где юность, где суть очеса и зрак плотский? Вся увядоша яко трава, вся потребишася. Приидите, ко Христу припадем со слезами.

Вси телеснии ныне органы праздны зрятся, иже прежде мала движими бяху, вси недействительни, мертви, нечувственни, очи бо заидоша, связастеся нозе, руце безмолвствуете, и слух с ними, язык молчанием заключися, гробу предается, воистинну суета вся человеческая.

Слава, и ныне, Богородичен: Спасай надеющихся на Тя, Мати незаходимаго Солнца Богородительнице, умоли молитвами Твоими

Проблагаго Бога, упокоити, молимся, ныне преставльшагося, идеже упоковаются праведных души, божественных благ наследника покажи, во дворех праведных, в память, Всенепорочная, вечную.

Глас 8: Присномятежное море жития претек, к Твоему пристанищу притече верою преставивыйся, но во Твоей тихости и присноживотной сладости со святыми наставляяй его (или, ю), упокой, Христе, душу раба Твоего (или, рабы Твоея).

#### Самогласен. Глас 4:

Приснопеваемый глас божественнаго Давида днесь исполняется, глаголющий: человек яко трава, дние его яко цвет сельный, тако оцветет. Егоже бо прежде в мале видехом жива, и глаголюща: се предлежит мертв, недвижим, бездыханен, изыде и от'иде от здешних тамо, идеже мзда о делех есть, тамо, идеже радость всех святых. С нимже упокой усопшаго, Боже, яко Милостив и Человеколюбец.

Глас 8: Вседержителю Господи, душу раба Твоего (или, рабы Твоея), Спасе, упокой в селениих праведных, идеже свет Твой сияет всем достойным, Едине Многомилостиве.

Исчезох сродства моего, и оставих прочее живота моего, и к Тебе прибегах, Господи, спаси мя.

Умири молитвами Богородицы житие нас, вопиющих ти: Живодавче, слава Тебе.

И повнегда быти целованию, глаголем тропари сия:

Со духи праведных скончавшихся, душу раба Твоего (или, рабы Твоея), Спасе, упокой, сохраняя ю во блаженной жизни, яже у Тебе, Человеколюбец.

В покоищи Твоем, Господи, идеже вси святии Твои упокоеваются, упокой и душу раба Твоего (или, рабы Твоея), яко Един еси Человеколюбец.

Слава: Ты еси Бог Сошедый во ад и узы окованных Разрешивый, Сам и душу раба Твоего (или, рабы Твоея) упокой.

И ныне: Едина Чистая и Непорочная Дево, Бога без семене рождающая, моли спастиися души его (или, ея).

Диакон глаголет: Помилуй нас, Боже, по велицей милости Твоей, молим Ти ся, услыши и помилуй.

Господи, помилуй, **трижды**.

Еще молимся о упокоении души усопшаго раба Божия (или, усопшия рабы Божия) имярек, и о еже проститися ему (или, ей) всякому прегрешению, вольному же и невольному.

Господи, помилуй, **трижды**.

Яко да Господь Бог учинит душу его (или, ея), идеже праведнии упокоеваются.

Господи, помилуй, **трижды**.

Милости Божия, Царства Небеснаго, и оставления грехов его (или, ея) у Христа Безсмертнаго Царя и Бога нашего просим.

Подай, Господи.

Диакон: Господу помолимся. Господи, помилуй.

**Священник глаголет молитву сию:**

Боже духов, и всякия плоти, смерть поправый, и диавола упразднивый, и живот миру Твоему даровавый, Сам Господи,

упокой душу усопшаго раба Твоего (или, рабы Твоя) имярек, в месте светле, в месте злачне, в месте покойне, отнюдуже отбеже болезнь, печаль и въздыхание, всякое согрешение содеянное им (или, ею) словом, или делом, или помышлением, яко Благий Человеколюбец Бог прости, яко несть человек, иже жив будет, и не согрешит, Ты бо Един кроме греха, правда Твоя правда во веки, и слово Твое истина.

Возглас: Яко Ты еси Воскресение, и Живот, и Покой усопшаго раба Твоего (или, усопшия рабы Твоя) имярек, Христе Боже наш, и Тебе славу възсылаем, со Безначальным Твоим Отцем, и Пресвятым, и Благим, и Животворящим Твоим Духом, ныне и присно, и во веки веков, аминь.

**И бывает отпуст.**

**По отпусте же духовник или наставник четет молитву прощальную:**

Господь Иисус Христос Бог наш, иже божественныя заповеди святым Своим учеником и апостолом давый, во еже вязати и решити падших грехи, и от оных, паки мы приемше вины тожде творити, да простит тебе, чадо духовное, аще что соделал еси в нынешнем веце, вольное или невольное, ныне и присно, и во веки веков, аминь.

*Таже взявше одр с мощами, отходим во усыпальницу, поюще стихиры самогласны, яже суть сия.*

Глас 1: Кая житейская сладость пребывает печали непричастна, кая ли слава стоит на земли непреложна? Вся сени немощнейша, вся соний прелестнейша: едином мгновением, и сия вся смерть приемлет, но во свете, Христе, Лица Твоего, и в наслаждении Твоя красота, егоже (или, юже) избрал еси, упокой, яко Человеколюбец.

Глас 2: Увы мне, яковый подвиг имать душа, разлучающися от телесе? Увы тогда колико слезит, и несть помилуй ю. Ко Ангелом очи возводящи, бездельно молится, к человеком руце простираючи, не имать помогающаго. Темже, возлюбленнии мои

братие, помысливше нашу краткую жизнь, преставленному (или, преставленной) упокоения от Христа просим, и душам нашим велию милость.

Глас 3: Вся суета человеческая, елика не пребывают по смерти, не пребывает богатство, ни сшествует слава, пришедши бо смерти, сия вся потребишася. Темже Христу Безсмертному возопиим: преставленнаго (или, преставленную) от нас упокой, идеже всех есть веселящихся жилище.

Глас 4: Где есть мирское пристрастие, где есть привременных мечтание, где есть злато и сребро, где есть рабов множество и молва? Вся персть, вся пепел, вся сень; но приидите, возопиим Безсмертному Царю: Господи, вечных Твоих благ сподоби преставльшагося (или, преставльшуюся) от нас, упокая его (или, ю) в нестареющемся блаженстве Твоем.

Глас 5: Помянух пророка, вопиюща: аз есмь земля и пепел; и паки разсмотрих во гробех и видех кости обнажены, и рех: убо кто есть царь, или воин, или богат, или убог, или праведник, или грешник? Но упокой, Господи, с праведными раба Твоего (или, рабу Твою).

Глас 6: Начаток мне и состав, жиждительное Твое бысть повеление, восхотев бо от невидимаго же и видимаго жива мя составити естества, от земли тело мое создал еси, дал же ми еси душу, божественным Твоим и животворящим вдохновением; темже, Христе, раба Твоего (или, рабу Твою) в стране живущих, и в селениих праведных упокой.

Глас 7: По образу Твоему и по подобию создавый в начале человека, в раи поставил еси владети Твоими тварьми, завистию же диаволею прельстився, снеди причастися, заповедей Твоих преступник быв. Темже паки в землю, от неяже взят бысть, осудил еси возвратитися, Господи, и испросити упокоения.

Глас 8: Плачу и рыдаю, егда помышляю смерть, и вижду во гробех лежащую, по образу Божию созданную нашу красоту, безобразну, безславну, не имущу вида. О чудесе! Что сие еже о нас бысть таинство, како предахомся тлению и припрягохомся смерти?

Воистинну Бога повелением, якоже писано есть, подающего преставльшемуся (или, преставльшейся) упокоение.

*Полагаются же мощи, дондеже приидем во усыпальницу, трижды. И бывает ектения, и молитва; достигше же гроба, полагаются убо мощи во гробе. Священник же персть взем лопатою, мещет на мощи крестовидно, глаголя: Господня земля и исполнение ея, вселенная и вси живущии на ней.*

**И вливает и елей, глаголя настоящий тропарь:**

Образом Креста Твоего, Человеколюбче, смерть умертвися, и ад пленися, и древле умершии воставше, песнь Тебе принесоша. Темже вопием Ти, Христе Боже: преставльшагося от нас упокой, идеже всех есть веселящихся жилище в Тебе, еже славити Твое Божество.

**И тако покрывают яко обычно гроб, глаголюще тропари сия, глас 8:**

Земле зинувши, приими от тебе созданного рукою Божию прежде, паки же возвращшася к тебе рождшей, еже бо по образу Создатель прият, ты же приими тело твое.

Якоже рекл еси, Господи, Марфе: Аз есмь Воскресение, делом слово исполнил еси, из ада призвав Лазаря; сице и раба Твоего от ада воздвигни, Человеколюбче.

Духовнии мои братие и спостницы, не забудьте мене, егда молитесь, но зряще мой гроб, поминайте мою любовь, и молитесь Христа, да учинит дух мой с праведными.

Диакон же глаголет ектению: Помилуй нас, Боже: и прочая по чину.

Священник же молитву: Боже духов и всякия плоти:



По возгласе же, Слава, И ныне: и отпуст. Творим же и поклонов 12 за усопшаго брата нашего, елицы обретаемся при погребении, глаголюще: Упокой, Господи, душу раба Твоего.

И тако отходим в келлии наша, славяще Бога.

*Текст приводится по изданию:*

*Требник монашеский. М, 2003. С. 135–148.*

*(По синодальному изданию 1906 г.)*